



**Japan-i missile tendangba mechi
North Korea-i amokmerener**

**Cincinnati Open nung
Alcaraz masayatsü**

VOL. XXIII ISSUE NO. 294 (ADOK 294) DIMAPUR YANGTEPNÜ (THURSDAY) LUROI (AUGUST) 06, 2026

₹ 5.00

H&FW dept-i Meningococcal disease indang metetdaksür

Dimapur, August 5, 2026 (TYO): Health and Family Welfare Department-i Nagaland nung school, hostel aser tanga shisaliok rejutem dang meningococcal tashidak nungi jenbua alitsü osang metetdaksüogo.

August 2, 2026 nü arishi küm 14 tain tebur ka CIHSR Hospital nung Paediatric Intensive Care Unit (PICU) nung aniok. Tanubosang ya temang meta shirang, saksü, low blood pressure liasü, tekolok meshitaki kuma kangshi aser tenük-telen junga marakzütet.

Lia aodang pa temang tamajungba aküm, teküp nung koma mesüka adok aser tang tashi intensive care support agidar. Tanubosang nem mechanical ventilation aser tanga life-sustaining treatment agütsüdar ta Department-i metetdaksüogo.

Doctor temi iba ya septic shock den purpura fulminans ta asadangtetogo aser meningococcal disease ta temulung malemer. Iba tashidak dang meningococcaemia ta ajar aser diagnosis jangjatsü atema

laboratory nung tendangdar.

Iba tashidak ya kanga bulua madoker aser anasa alir den menateper, talisa hostels aser dormitories amala tesemtem nung menateper ta department-i ashi.

Meningococcal disease ya bacterium Neisseria meningitidis ajanga adokdaksür aser meningitis kuma aoer. Iba ajanga tekolok aser spinal cord meketa aliba protective membranes nung

kongshir mesüra septicaemia ta ser bloodstream

infection adokdaksür.

Department-i kaketshirtem, tesayurtem, hostel ketdangpurtem aser healthcare personnel dang ajungbena temang metaa shirangba, tekolak angohba, tekong marakzükteti akümba, saksüba, tesangwa methizükba, rataralemba, anünüba, tokyimra ama kangshiba aser teküp nung temeremso komo adokba nung tenük yoktsü metetdaksüogo.

Item mesükba timtemertemi tekaratiba nung anasatiba healthcare facility nung oa diagnosis aser treatment asütsüla ta Health and Family Welfare Department-isa metetdaksüogo.

KAKETSHIRTEM KANGA KÜMDANGTSÜLA

Jharnapani-Molvom atema traffic advisory agütsür

Dimapur, August 5, 2026 (TYO): Tzünglu kanga aruba agi Jharnapani nungi Molvom tsüngda apu tzu agi ponger ogo aser iba atema Commissioner of Police, Dimapur Aotula T. Imchen, IPS-i traffic advisory ka agütsüogo.

Chümoukedima aser Jalukie, Peren tsüngda senzürtemi iba traffic advisory sülen anidaksü atema CP Dimapur-i metetdaksüogo.

LIGHT MOTOR VEHICLE:
1. 7th mile Jn Chumokedima nungi Shokhuvi Village adena

Pimla Village.

2. New Chumoukedima (Iron Structure Bridge) nungi Ruzaphema Village adena Gaili Village.

3. Medziphema nungi Sirhi Angami Village/ Sochunoma Village adena Punglwa Village.

HEAVY MOTOR VEHICLE:

1. Gari tulu ajak temalen agüja aliba lenmangtem nung mesenzütsü.

2. Jharnapani nungi Molvom tashi temporary bridge yanglushiba sülen ang HMV traffic melatsü.

Dimapur nung kiyong aika metsüngbang

Dimapur, August 5, 2026 (TYO): Dimapur nung anogo ananü tzünglu kanga aruba ajanga tesem aika metsüngbang.

Tanep tashi nung tesem aika den Netaji colony, Vilhume colony, Medical colony, SM colony, Police colony, Bank colony, Burma Camp East Block, Supermarket area, Riverbelt colony aser Zeliangrong colony tzu agi kanga mejungi mobanger nübortem timtemogo.

Tzümetsüng ajanga kiojen kanga mejungi raksababo mali

saka ghonda aika lir ang tzu yimzüka alur ta kiyong balala nung alirtemi ashi. Parnokisa ketdangsürtem drainage system ulushitsü aser tajungba akümtsü mepishia metetdaksüogo.

Dimapur Urban Council Chairmen Federation (DUCCF), district administration, District Disaster Management Authority (DDMA) aser lokti balala yaritepa Dimapur tesem balala drainage clearance drives inyaka aruaka drainage system nung metokmeperi aser teinyaktsü aika aliba maneni sayuogo.

Union Minister JP Nadda-i Mon nung anentsüh aludak semdang



August 5, 2026 nü Union Minister of Health & Family Welfare and Minister of Chemicals & Fertilizers Jagat Prakash Nadda-i Mon jila nung anentsüh aludak semdang dang agiba noksa ka angur.

Dimapur, August 5, 2026 (TYO): Union Minister of Health & Family Welfare and Minister of Chemicals & Fertilizers Government of India, Jagat Prakash Nadda-i Bodbarnü Mon jila semdangogo aser Centre sorkari takoksa ajurua aliba kibongtem nem teyari agütsütsü nangzüko.

Tzünglu kanga aruba ajanga July 19 nü Mon jila nung anentsüh aika alu aser ano district kübok tesem aika nung ajungben tzümetsüng timtem ajurua liasü. Tzümetsüng lendong balala nung ki 800 tema ponger ogo aser 1079 terara raksaago ta ketdangsürtemi ashi.

Assam Health & Family Welfare Minister Ashok Singhal aser Nagaland MP S Phangnon Konyak nati Union minister Nadda meina aru aser parnoki anentsüh agi kongshia aliba kibongtem den ajurutepa sensaksemogo.

Centre sorkari Mon district nung relief, rehabilitation aser restoration maparen nung akokba

tashi teyari agütsütsü ta Nadda-i nangzü.

JP Nadda-i Defence Colony aser Techa ward nung anentsüh aludak semdang liasü.

Paisa Konyak Union Office, Mon nung anentsüh agu timtem ajuruba kibongtem den ajurutepa sensaksem.

"Iba tejashi mapang nisung aikati aser sorkari Mon district nung alirtem den külemi noktaka lir. Ni kü tenük agi nguogo aser tensa metetogo anungji India sorkari akokba tashi teyari agütsütsü. Centre nungi teshimtet telok kati semdang teyari agütsütsü" ta Nadda-i ashi.

"Prime Minister Narendra Modi-i Mon district semdangsü aser tensa asadangsü atema mapa lezmüksü. PM Modi-i tasür kibong ajak den mangyim lemsateper aser iba lendong ajanga kongshia aliba nübor ajak den külemi noktaker" ta pai ashi.

Deputy Commissioner-i anir District Administration, Konyak Union, Konyak Students' Union, Konyak Nyupuh Sheko Khong

nungeri Relief Camps nung yaritepba atema palar. Maneni, DC, SP, SDRF, Civil Societies aser volunteers densema rescue teams nem tenütsang agütsür ta Nadda-isa ashi.


Anentsüh aser ajungben tzümetsüng lendong balala atalokba ajanga lenmangtem, apu aser public infrastructure aika raksaago ta Mon Deputy Commissioner Wennyei Konyak-i ashi.

Yimtsüng aika tesenzüdak mali aküm aser tzünglu kanga aruba ajanga Mon district kübok tesem aika nung anentsüh alua lir ta paisa ashi.

Konyak Union President, Yamao Konyak-ia Union Minister Nadda aser par telok dang pelaba metetdaksü.

Senden nung Asst. Manager (Response & Communication), NSDMA & Nodal Officer (Disaster Management), DDMA Mon, Rendemo Shitio-i PowerPoint Presentation ka ajanga teraksa anguba osang lemsatep.

NEEPCO-i Doyang reservoir nungi tzu talila yimdoker



Guwahati, August 5, 2026 (Agencies): Nagaland nung Doyang Hydro Electric Project ajanga Bodbarnü tzu chiokba atema Assam nung ayonglanglen alirtem dang kümdangtsü metetdaksüogo.

Iba hydropower project ya North Eastern Electric Power Corporation Limited (NEEPCO) ajanga acha-ayanger aser nikongdang 4:00 ako meta nungi

'regulated discharge' tenzüka liasü.

Iba ya routine monsoon reservoir management protocol ka lir aser spillway gates pezü lapoker tzu talila atsüngdenba yimzüka yokogo.

Iba reservoir nung tzu talila atsüngdenba liromedemtsü aser lateta aliba storage level ayutsü atema tzu yimzüka yokogo. Talisa tzüngluruwa

mapang tzünoctang kümzüka ayutsü atema iba mapa inyaker ta ketdangsürtemi ashi.

District administration tem aser disaster management ketdangpurtemi ayongküm anasa aser tzümetsüngtsüsa aliba tesemtem nung alirtem kümdangtsü metetdaksüogo. Parnokisa ayongtem anasa maotsü nenshiogo.

Dimapur nung SIR inyakyim nung yariteptsü ayongzüker



Electoral rolls indang Special Intensive Revision (SIR) atema senden nung Deputy Commissioner & District Election Officer, Dimapur, Dr. Tinojongshi Chang, NCS-i Village Councils aser Town Councils züngsemtem den jembidang tangokba noksa

Dimapur, Luroi/August 05 (TYO): Electoral rolls indang Special Intensive Revision (SIR) dak sendakba nung Office of the Deputy Commissioner & District Election Officer (DEO), Dimapur ajanga August 5, 2026 nü Village Councils aser Town Councils züngsemtem den senden ka mena liasü.

Iba senden nung Dimapur-I, Dimapur-II aser Dimapur-III Assembly Constituencies kübok Village aser Town Councils ajunga indang chairmen tem den item tesemtem nungi Gaon Bura (GB) ka-ka dena liasü. Special Intensive Revision maparen tajungba nung inyaksü atema jembishinütsü nükjidong nung iba senden ya ayongzüker.

Deputy Commissioner & District Election Officer, Dimapur, Dr. Tinojongshi Chang, NCS ajanga iba senden tenzüka jembidang nübur ajunga dang Photo Electoral Rolls, 2026 indang Special Intensive Revision mapang Booth Level Officers (BLOs) tem den akok tashi yaritepa electoral roll

shidak renemtsü ayongzüka liasü.

BLOs temi August 16 nungi September 14, 2026 tashi kibong sema Enumeration Forms (EFs) lema aser bendena arutsü, anungji electors temi passport-size photographs terenem yua alitsüla, kechiaser ibaji kechi südir süaka nüngdakba lir, ta pai metetdaksü.

DEO-i Administrative Officers, Village Councils, Village Development Boards (VDBs), Gaon Buras (GBs), Colony Councils, Ward Authorities aser tanga stakeholders tem dang BLOs den yariteptsü, iba sentong indang osang prokshitsü aser kibok sema aruba mapang nüburtem kidang alitsü asoshi ajungshitsü ayongzüka liasü.

Senden nung Assistant Election Officer, Dimapur, Toshimongba Longchar ajanga Special Intensive Revision inyakyim indang tarensen rateta ashi.

Draft electoral roll ya September 20, 2026 nü

adoktsütsü, iba sülen September 20 nungi October 20, 2026 tashi temotongshitsü aser melenshitsü atema filing asütsü, ta Longchar-i metetdaksü.

Temotongshitsü aser melenshitsü alibatem November 18, 2026 tashi inyaksü aser final electoral roll ya November 22, 2026 nung adoktsütsü. Revision atema qualifying date ya October 1, 2025 alitsü, ta paisa ashi.

Mapping issues, anomalies mesüra metokmeperi aliba electors tem Electoral Registration Officer (ERO) mesüra Assistant Electoral Registration Officer (AERO) dangi Election Commission of India ajanga ashiba documents bener arutsüsa akumtsü, ta paisa metetdaksü.

Osang tali tejangjaba aginer mesüra teyari aginer temi Election Commission indang toll-free helpline 1950 ajanga tongteprateptsü mesüra ECINET sapang ajanga electoral services amshitetsü, ta metetdaksü.

Nagaland Bhojpuri Samaj-i Mon nung teyari agütsü

Dimapur, Luroi/August 05 (TYO): Mon district nung tawa alinen aser tzümetsüng agi kongshir aliba kibong aser kaketshirtem nem Nagaland Bhojpuri Samaj-i Konyak Union Dimapur ajanga nüngdakba osettsüset teyari agüja liasü.

Mon District Flood & Landslide Relief Drive ayongzükbaba nung Bhojpuri

Samaj indang züngsem temi kidang nüngdakba mattresses, bedsheets aser merila sü den kaketshir asoshi notebooks, pencils, pens aser pencil boxes aser chiyongsü tem bendenja liasü.

Bhojpuri Samaj züngsem temi iba ama mapa tajung inyakba asoshi Nagaland Bhojpuri Samaj-i pelaba lemsatep aser

parnok mapa tajung ajanga timtem nung aliba nüburtem nem anisüngzüker agütsü ta ashi.

Parnokisa ano par züngsemtem aser temulunger tem dang maneni iba relief and rehabilitation inyakyim nung yariteptsü ayongzüker aser iba ama mapa tajung ajanga timtem ajuru alirtem anisüngzüker angutsü ta ashi.



Chathe ayong nung tzü kanga sashia ayimba ajanga SDO (C) Kuhuboto, Nuhuta Tunyi-i nüburtem takum kumzüka ayutsü mechi Niuland District kübok Khughovi yimtsüng nung aliba Khughovi Bridge shibangtsü August 5, 2026 nü totuyuba agütsüogo.

DC Dimapur-i ayong nung machine tulu amshiba nokdang

Dimapur, Luroi/August 05 (TYO): Libajen aser nüburtemi amshiba infrastructure kumzüka ayutsü mechi Deputy Commissioner, Dimapur, Dr. Tinojongshi Chang, NCS ajanga Dimapur district telungzüker nung temelaba aser licences magie ayong nungi machine tulu amshia lisem, longsang, buulders aser ayong nung aliba osettsüset agitetba ajunga nokdangogo.

Libajen samaa aoba, biodiversity samaba, ecosystem nung kongshiba, tzü menenba aser aluyimba maparen nung teraksa bener arutsüba ya talisa tapi agi machine tulu amshia ayong nungi lisem aser longsang agitetba ajanga lir, ta ashi. Ajidang masü, iba ama inyksangshi yagi lenmang, apu, culverts, railway infrastructure aser tzü mesüba tesemtem nunga kanga mejungi kongshir, ta totuyuba nung ashi.

Tazüokba makai ayong nungi lisem aser long agizükba ajanga ayongkum metenzüka aor, alinen alur aser alimar lendong timtem ajuru, groundwater levels ajemdaksür, tajemtsü aser tzülü atema tzü ajema kumdaksür aser 'sediments' pasasa ayimba nung kongshia tzü nung aliba takumsangnu, public safety aser nüburtem rongsen lenmang asoshi timtem tulu agütsü, ta ashi.

Item inyakyim yagi

Environmental Protection Act, 1986, Wildlife (Protection) Act, 1972, the Water (Prevention and Control of Pollution) Act, 1974 aser Nagaland Minor Mineral Concession Rules, 2004 indang Rules 49 aser 50 nung aibelener. Permits mesüra licences tejangja makai mining operations inyakba ajunga ozüng alema inyakba ama züngshitsü, ta Deputy Commissioner ajanga ashi.

Nagaland (Ownership and Transfer of Land and its Resources) Act, 1990, Nagaland Minor Mineral Concession Rules, 2004 aser tanga nüngdakba mera tem agiba sülen ang heavy machinery amshia ayong nungi ali rongsen agitetsü melatsü, ta ashi.

Iba totuyuba nung aibelenba kija, telok, firm mesüra organisation nem tapet ozüng amshia temerenshi agütsütsü. Iba totuyuba shidak amshitsü mechi District Administration, Police, Geology and Mining Department, Forest Department nungi ketdangsürtem, Civil Society Organisations (CSOs), Village, Municipal aser Town Councils nungi teshimtet ketdangsür temi tentetba Monitoring Team kati iba totuyuba achayangtsü, ta DC Dimapur sangdong ajangasa metetdaksü.

Dimapur nung stone crusher units atema awareness sentong ayongzüker



Dimapur, Luroi/August 05 (TYO): District Industries Centre (DIC), Dimapur ajanga Nagaland Pollution Control Board (NPCB) den lungjemer National Clean Air Programme (NCAP) kübok stone crusher units atema 'Special awareness and sensitisation programme' ka Hotel Saramati, Dimapur indang Conference Hall nung August 5, 2026 nü ayongzüka liasü.

Iba sentong nung N. Abeno Lotha, Functional Manager, DIC Dimapur menden liasü aser lai shilem agirtem pela agizükba den libajen wazüka ayutsü atema stone crusher units kibur aser operators nem awareness agütsütsü nüngdakba lemsatepa liasü.

Chikuotho Nyusuo, General Manager, DIC Dimapur ajanga iba sentong ayongzükbaba nükjidong lemsatepdang, industry ainba aser libajen wazüka ayuba kasa asütsü nüngdaker ta ashi.

Pai stone crusher operators tem dang libajen wazüka ayuba yimyatam amshitsü aser ozüng sülen anidaksü ayongzüka liasü. Olivia Choppy, Senior

Scientific Assistant, NPCB ajanga "Ambient Air Quality and its Impact" onük nung ajemdaker jembidang stone crusher units nungi aoyi adokba ajanga mopung menendaksüba indang rateta ashi.

Lai mopung quality tajung lidaktsütsü tongtipang ta rateta ashi aser libajen wazüka ayuba nung Nagaland Pollution Control Board-i inyakba indanga lemsatepa liasü.

"Environmental Compliance of Stone Crusher Units" indang technical session mapang Mvudzeyu Shuya, Scientist 'B', NPCB ajanga stone crusher units tem atema ozüng balala yanglua aliba rasaa shia liasü.

Lai Pollution Control Board nungi nüngdakba temelabatem meshitsü, tzü-mopung menenba nungi kumzüksü meratem agitsü aser temerenshi mangutsü mechi ozüng shidak amshitsü aser nüburtem takum kumzüka ayutsü indang shia liasü.

Iba sentong tembanga Jethro Mesen, Functional Manager, DIC Dimapur ajanga melepzüng o jembia liasü.

Gujarat tesem balala nung Chandipura virus ajanga tanur 22 süogo

New Delhi, August 05 (Agencies): Gujarat state nung Chandipura virus ajanga tanur 22 süogo aser tang tashi nung nisung 35 dak iba tashidak putetogo.

State Health Minister Praful Pansheriya-i, state nung iba virus keta alitsü südi ta melung melemi bilemba ajak dakbo Chandipura virus meputet, ta metetdaksü.

Paisa, "Tang tashi nung state nung melung melemi nisung 184 dak iba tashidak tendangogo, aser iba nungjagi nisung 35 dak Chandipura virus putetogo. Ano samples 11 tendangba osangbo tang tashi mangu," ta

metetdaksü. Tang tashi nung iba virus ajanga tanur 22 süogo, ta pai metetdaksü.

Chandipura virus keta alir nisung tenet state balala nung aliba civil hospitals nung treatment agidar aser shiranger trokba aneper kidangi yokogo.

Sabarkantha district kübok Gandhinagar aser Himmatnagar na aser Patan, Rajkot aser Bhavnagar nung aliba civil hospitals nung shirangertem nem specialised treatment agütsüdar, aser doctor temi parnok maneni mita repringdar, ta minister-i metetdaksü.

"Iba tashidak agi shirangertemji yimtsüing ka

mesüra kiyong ka nungi dang masü saka Gujarat tesem balala nungi lir. Ibayongji health department teams tesem balala nung maneni yakyaka lir," ta pai metetdaksü.

Sorkari sorkar aser private paediatric hospitals ajak dang iba virus temaitsü keta alirtem ajak agizüka intensive care units (ICU) nung anepaluang, ta tuyuogo. "Tang tashi nungbo Chandipura virus atema vaccine mesüra mozü mali. Iba virus atema vaccine aser treatment atema doctors aser researchers team kati scientific research agidar," ta paisa metetdaksü.

Parliamentary Affairs Minister Kiren Rijiju-i Rahul Gandhi ajuru

New Delhi, August 05 (Agencies): Tesüiba anogo aika Parliament nung senden junga magiteti aruba nung ajemdaker Bodhbarnü Parliamentary Affairs Minister, Kiren Rijiju-i Lok Sabha nung Opposition lenir, Rahul Gandhi ajuruogo.

Osang angazükba agi, Parliament office nung Rijiju aser Rahul Gandhi na minute 50 jungnüa senden amen. Iba senden nungji Congress lenir Priyanka Gandhi Vadra-a liasü.

Iba senden nungji Rijiju-i Delimitation Bill dak sendakba nung opposition tangatetba asüngdanga liasü.

Tang tashi nungbo Parliament nung Delimitation Bill mesüra Women's Reservation Amendment Bill benoktsü tebilemba mali.

Ano külen tanga osang ka nung, Union Home Minister Amit Shah-i Foreign Contribution (Regulation) Amendment Bill, 2026 benoktsü, ta metetdaksü.

Bodhbarnüa Lok Sabha nung opposition-i onük balala nung longkak aita yimyim ayimba agi nikongdang 2:00 ako tashi senden thinenba sülen Rijiju-i Rahul Gandhi ajuru.

July 20 nü Jantar Mantar nung kaketshirtemi longkak aitdang police-i tashiyim amshiba anema longkak aita opposition-i Ato kilonser Narendra Modi aser Union

home minister Amit Shah nati Parliament nung sangdong ka agütsütsüla, ta takhangba agütsür.

July 20 nü tzungluruwa mongpu Parliament senden tenzükba anogo nungi Lok Sabha nung Question Hour khien danga tembanga magiteter. Senden nungsa maneni yimyim ayima longkak aitba agi o melemtepi Bill pongubo agizükogo.

Bodhbarnü senden tenzükba sülen Lok Sabha Speaker Om Birla-i züngsemtang dang Question Hour tenzüksü atema peipei mendeni oa menang, ta mepishia liasü.

Birla-i opposition züngsemtang dang, "Kima süaka telung nung süaka yimyim ayimtepba ya democracy atema majung. Ozülü sayuba aser yimyim ayimba ajanga nenoki iba senden akhümket raksatsür," ta metetdaksü.

Birla-isa, opposition-i timtem agütsüba ajanga MP tem aikati kanga tongtibang t a s ü d a n g d a n g b a t e m masüngdangteter, ta metetdaksü.

Bodhbarnep Rahul Gandhi aser Congress Tir Mallikarjun Kharge na densema opposition MP tem aika Prerna Sthal nung Gandhi kürakyanglu aliba tesem nungi Parliament nung Makar Dwar tashi Union home minister Amit Shah anema longkak aita jaja.

Lok Sabha Secretariat nung director, Guarav Gautam soseta asü

New Delhi, Luroi/August 05 (Agencies): Lok Sabha Secretariat nung director ka Noida nung par kidang soseta sür lia angu, ta Bodhbarnü police-i metetdaksü.

Amongnü Noida Sector 82 kübok Kendriya Vihar-II Society nung Gaurav Gautam par kidang tsüngbang nungi lisü agi alenseta sür lia angu.

Police-i ashiba agi, pa asüba takdang nungji soseta asüba shidi ka nguogo, aser shidi nung zülua alibaji asadanga bushisüngdangdar.

Phase-2 police station-i ashiba agi, Gautam anir aoba hospital nungi police nem iba

osangji metetdakja liasü. Hospital nung doctor temi, Gaurav Gautam ji hospital tonga anir arudangbo süadoker liasü ta ashi. Iba tatalokba mapang nung Gautam kinüngtsübo lar tsürabur kidangi oor liasü. La meyipa aruba mapang kiji shibanger liasü, anungji lai security guard ka teyari agia ki telung jagi ai nung Gautam lisü agi alenseter liasü.

Iba sülen pa anasa aliba private hospital kati anir ao.

Forensic team aser local police-i iba tesemji semdanga kuli balala bendenogo, iba sülen tasümangji post-mortem agitsü atema bener yok.



August 05, 2026 nü Ranchi nung Jharkhand Loktantrik Krantikari Morcha züngsem, Devendra Nath Mahto-i recruitment examinations nung ochimashi anema lumia longkak aitba noksa nung angur.

PRESS NOTICE

PUBLIC NOTICE IN RESPECT OF PETITION FOR APPROVAL OF ARR& TARIFF PROPOSAL FOR THE FY 2026-27.

FILED BY,
DEPARTMENT OF POWER, GOVT. OF NAGALAND
BEFORE,
NAGALAND ELECTRICITY REGULATORY COMMISSION (NERC)

1. Notice is hereby given to the all consumers and stakeholders that the Department of Power, Govt. of Nagaland, a Deemed Licensee, has filed its Petition For approval of ARR & Tariff Proposal for the FY 2026-27(w.e.f. from 01.10.2026 to 31.03.2027) before the Hon'ble Nagaland Electricity Regulatory Commission (NERC), on 28th Nov, 2025 & Revised calculation submitted on 27th July, 2026 under section 61, 62 & 64 of the Electricity Act 2003 and NERC MYT Tariff Regulations, 2016.
2. The petition has been admitted by the Hon'ble Commission on 3rdJuly, 2026 and numbered as Petition No. 02/2026-27. The proposals is as summarized hereunder:

Objections/Comments are invited from various stakeholders on Petition for Approval of ARR & Tariff Proposal for the FY 2026-27 by Department of Power, Govt. of Nagaland.

3. Highlights of the ARR & Tariff Proposal for the FY 2026-27as submitted by Department of Power, Govt. of Nagaland.

Table - 1: Aggregate Revenue Requirements for the FY 2026-27 (Rs. Cr.)

Sl. No.	Particulars	Approved in MYT Tariff Order dated 28th March 2025		Total Claimed for ARR of FY 2026-27 (Projected)	
A	Power Purchase Cost	514.16		495.49	
B	Transmission Charges	85.12		86.10	
1	Total Power Purchase Cost (A+B)		599.28		581.59
2	Cost of Generation		16.96		10.13
A	Employee Expenses	198.72		186.64	
B	Repair & Maintenance Expenses	17.81		12.38	
C	Administration & General Expenses	4.55		5.76	
D	Operational Expenses - Smart Prepaid Metering	44.89		14.56	
3	Total O & M Expenses (A+B+C+D)		265.97		219.34
4	Depreciation		77.64		78.12
5	Total Revenue Requirement (1+2+3+4)		959.85		889.17
6	Less: Non-Tariff Income		5.99		5.99
7	Net Revenue Requirement (5-6)		953.86		883.18

Table - 2: Proposed Energy Charges for Post-Paid Consumers for the Period of 01.10.2026 to 31.03.2027

Sl No.	CATEGORY	Proposed Rate for the Period of October 2026 to March 2027 Rs./kWh
1	2	3
A	CATEGORY 'A' DOMESTIC	
	(a) 0 to 30 kWh	6.10
	(b) 31 to 100 kWh	6.60
	(c) 101 to 250 kWh	7.60
	(d) > 250 kWh	8.30
	CATEGORY 'B' INDUSTRIAL	
	(a) < 500 kWh	7.50
	(b) 501 to 5000 kWh	8.15
	(c) > 5000 kWh	8.70
	3	CATEGORY 'C' BULK
	8.00	
	CATEGORY 'D' COMMERCIAL	
	(a) < 60 kWh	8.60
	(b) 61 to 240 kWh	9.95
	(c) > 240 kWh	10.35
5	CATEGORY 'E' Public Water Works & Sewage	8.60
6	CATEGORY 'F' Public Light	To be recovered from consumers *
7	CATEGORY 'G' INTERSTATE	7.25
8	CATEGORY 'H' AGRICULTURE	3.85
9	CATEGORY 'I' TEMPORARY CONNECTION	DLF Rs.12.00 Others Rs. 15.00
10	Kutir Jyoti(point)	Same as DLF
11	VEMB/ Single Point Metered (Rural)	6.20
12	UEMB/ Single Point Metered (Urban)	0.00
13	EV Charging Stations	8.80
*	Charges for public lighting have to be recovered from the Consumers of Domestic, Commercial, Industrial and Bulk categories at the rates shown below:	
	Domestic	Rs. 10 per connection / month
	Commercial	Rs. 15 per connection / month
	Industrial	Rs. 20 per connection / month
	Bulk Supply	Rs. 25 per connection / month

Table - 3: Proposed Energy Charges for Pre-Paid Consumers for the Period of 01.10.2026 to 31.03.2027

Sl No.	CATEGORY	Proposed Rate for the Period of October 2026 to March 2027 Rs./kWh
1	2	3
1	CATEGORY 'A' DOMESTIC	
	All Units	6.05
2	CATEGORY 'B' INDUSTRIAL	
	All Units	7.10
3	CATEGORY 'C' BULK	
	All Units	7.35
4	CATEGORY 'D' COMMERCIAL	
	All Units	9.00
5	CATEGORY 'H' AGRICULTURE	
	All Units	3.45

It is submitted that the Component wise details of ARR & other parameters, proposed by the Department of Power, Govt. of Nagaland may be increased, decreased or may amended by the Hon'ble NERC, even if not proposed by the licensee, to meet the requirements of Tariff Policy, Electricity Act and any decision by the Hon'ble APTEL or Hon'ble Supreme Court on any Electricity related matter. The consumers and other stakeholders are invited to give their written suggestions/objections/comments. Written suggestions/objections/comments on ARR & Tariff Petition for the FY 2026-27or any other aspects of the Petition limited to the specified subjects as above should be sent to "The Deputy Director, NERC, near E-n-C Office, Department of Power, A.G Colony, Kohima by 14th Aug',2026and a copy to the Chief Engineer (D & R), Department of Power, Govt. of Nagaland, Kohimai-797 001. Copies of filings and application referred at above are available in the office of the Chief Engineer (D & R), RMC Branch, Department of Power, Govt. of Nagaland, Kohima-797 001. Interested parties may inspect / peruse the said Tariff Petitionand take note thereof during office hours at the office. Further, Copies of the above documents can also be obtained from the above office on payment of Rs.200/- for each set in cash or through DD. Suggestions in this regard may also be sent to nerc_kohima@yahoo.comandcepower1@gmail.combefore 14th Aug', 2026.

Addl. Chief Engineer (D&R),
Department of Power
Nagaland: Kohima



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 06, 2026

Foothill Road kanga nüngdaker !

Asenok nübortem asoshi kangasa nüngdak asünungji, asenok Ao kinbo asenok arogo tenla kidang dena temulunger tenla sarua Nagaland tenemtsüng lenmang, Nagaland Foothill Road 2014 küm nungi yanglu tenzükbä, tang küm 12 nung lenmang jungjunga renemer Mon district nungi aruagi Niuland aser Peren district tashi Assam majangi ayongayonga kua tebennütsü bena senzüa alitsü melen, koda sütsü, asenok Nagaland nung alir Naga nunger yimya asünungji, Foothill Road yangluba mapa merenem ser anenogo. Ajisüaka, tang ama asen lima tesem ajaklen lenmang mejungi raksaba angu dang aser nisungtem timtemba angashidang, Foothill Road ya tangsa taginüba aser tenüngdakba bilema aginür. Atangji, tangar state nung asünungbo asenoki kanga aginüa jembiba tenemtsüng lenmang, Foothill Road, ya nübortem bang nungi madok dang, government-i nübortem nüngdak reprangteta renemtsür alitsüba mapa ka lir, saka asen lima yabo tangar lima amato masü, kechiyong asenok government yabo tangar government amato masü aser asenok nübortema tangar nübortem ama masü, asenok arok nüngdak atemabo asenoki süoki ia mebilemer aser arok nüngdak dang nungibo pei nüngdakang tuluba amai bilemer. Iba jagi asen lima nungbo arok jajatsü atema gari lenmang yanglutsü agibo, asenok ajaki pei kiang tuluka yanglutsü aser arok ajangzüksü atema yimkong mapa ka inyaksü agibo iba sen jagi ali tuluka alir pei meyong farm-ang ka ayimtsü mesüra resort-ang ka lapoktsü. Ibayongji, Nagaland nung ya asenok ajak jajatsü arok meyong lenmang yanglutsü, renemtsü aser anepalutsüba nungbo temulung magütsür saka ki tajung aser farm tulu agi Nagaland-bo süngogo. Ajisüaka, asen ki tajung nungi ayazüka alua gari tajung nung mener lenmang mejungra, iba jagi asen limabo topur mejungi kümdaktsür. Kasaji, asenok farm leni aodang gari lenmang mejungra asen akaba farm-ji asen atema nümadangtsü mapa kabo masü akümer. Aji oda, kasa lenmang tamajung nungsa jajar asüyonga takar aser tulurtem dang nungibo, ano, terben agi sensaker aser tilarterm timtatamba aser takoksa tuluba ngudagi ta bilemdi. Aji oda, tang tashi nung foothill lenmang yangluba nung sen crore noklang asem pezüka shi endoker alitsü aser ano sen crore noklang asem pezü ka endok nung gari jajattetsüsa lenmang lapoktetsü. Ajisüaka, tesasatsüka Foothill lenmang merenemdang, iba lenmang atema sen, crore noklang ta masü, meyirijang aika meshir National Highway küma yanglutsü tebilemba benoka tang tayangludak Foothill lenmang anena lir. Aji oda, foothill agi Trans Nagaland Highway küma upgrade asütsüba bilemertem mulungjang nung ya shitakba Trans Nagaland Highway nungji Naga nunger anisüngzüka jajaa angur asü mesüra sen crore meyirijang ta asüba dang anguar ashitsü makok. Ajisüaka, asen government-i foothill lenmang teyangludak nung anena yur sen crore meyirijang aika bener arua foothill road agi Trans Nagaland Highway küma yanglua mangur. Atangji, gari lenmang tulubajisa tajungba saka tamasa gari lenmang tilaka danga renemer yangji gari jajaya lira, iba lenmangji 'upgrade' ser tuluba küma Highway yanglutsüba jibo, asenoki bushiba agi masü saka mapangi bener arutsütsü. Atangji, taaktsüka asenok ya meshimetsür kolok atenba nübortem lir, anungji asen lima nungbo yimsüsür aser tulurtemi anir asenok nübor ajunga asenokia kechi agütsütetsü aser kechi inyaktetsü ta bilemer masü saka kechi meshitsü ta asüba dang bilemer aser jembir. Iba jagi foothill Road teyangludak nunga, lenmang ya kodang renemtsü ta bilemstü melen, ano kechi meshitsü (?) ta asüba meshimetsür shisatsüang aru südi. Joko, asenoka meshimetsür kolok yabo endoktsü merangdi aser tangari agütsüba sen shitak amshia tangaria junger ta temulung lemteta jembitsüsa inyakdi. Iba tangatetba nung, Foothill agi Highway akümtsü asoshi sen meshitsüba tebilemba ya-ang khen anena atatsüla aser kechisüdirsüka yanglutur aliba tenemtsüng lenmang yabosa renemtsüsa, ano khen, nüngsen agia nübortemia ola adoktsüla aser government-ia mulungtetsüla.

OLEMSABANG

SARASADEM TASHI KODA TULU

~ Wb. S. Aosüngküm Ozüküm. Dimapur.

Oh! sarasadem tashi den medemdangtsü kecha makaka.
Sarasadem tashii jakjaa meremba temenen shitoktsür,
Sarasademi menenpur Tsüngrem den putepshidaktsür.
Sarasademi Tsüngrem aser nisung tsüngta angatetteper,
O, Sarasadem tashi koda tulu aser koda tesüngmangtsü.
Kechiaser tamakoktsü agi takoktsü küma melenshidaktsür,
Yisui anogo ana aser amtsük pongu amer moaja sarasadem,
Nisung meyi pungu chiyungdaktsür molok terana anüng.
Ya sarasadem tashi Kibuba madang jungkai adokba lir.
Ochi Sarasademi Tematiba Tsüngrem narong adonger,
Kotak aser alima tsüngta apularji sarsadem tashiji lir.
Kibubai temulungjang teraksa sarasadem pelaa agizüker,
Temulung meyipbapur tenük nungi nüktzü jenti ayimer,
Sarasadem sobutsü soburtem Tsüngremi keta asener.
Tasü agi taküm kümdaktsüba sarasadem tashi koda tulu,
Tamanger ka sarasadem sobutsüji ajak dang tashi tuluba.
Sarasadem, timtem,tuokrong, mapang ajak nung taneptsür,
Tensa ajak nung ochi agi sarasademra teimla talubosa kar.
Makamaiti alidanga sarasademra jakdaka jenti moatsür,
Sarasadem tashii mulungzürep khuret ajak pongdoktsür.
Manglisangwali tamanger lenniba ajokji sarasadem tashi.
Yihusua-i teka mekanga ayimtena sarasadem,anü sota ayu.
Atangji atalok, kechiaser ochi sarasadem Kibubai agizük.
Yisui mechioker temekok agi tsükita tebu dang sarasadem,
Ali nung apudaker sarasadem baji san temu danga taoba.
Alima tashi ajak meyoktepaka sarasadem tashi makoktsü.
Temulungjang teraksa bener sarasademeri temoatsü angur,
Tenla aika dang nungibo temulungjang teraksajisa sentiba.
Ochimashi sarasadem agibo Tsüngrem narong madonger
Saka ochi sarasadem agi Tsüngrem asen tsütsü meyiper,
Oh,sarasadem tashi na koda tulu, Kibubai teti angaa alir.
Pai Pa mesüka yangluba nisungi sarasademba yongyaa atar,
Tsüngrem tenüng sanga sarasademba olaji kotaki atur.
Chichiba sarasadem metsükdaki kotak tashi yima atur,
Maneni sarasadem bapur kata mezüdoki Pai ajioka ayur.
Temulungjang teindang sarasademi Kotak kijiba lapoker.
Oh, ochi sarasadem ajak madak tashi tuluba aser jong lir.
Kü nelai manglisangwali ne dang methitemi sarasademdi,
Kü menen jakja meremaka rüjep ama mesünga kümjangma.
Kechiaser nisungi sarasadem medeni ne den jembitsü mokok,
O, Kibuba ne tejak ozü tsütsü shilokja sarasadem langzüangma.
Kü nelai na yongyar aser kü mulungjang ne tsütsü lapoka lir.
O, Kibuba kü taginüba tesongtem,kechiaser ni tanela nung tzürar.
Na kü jenokdak lung aser kü mitsa, Nasa teti tatem maka Kibuba.
O, anüngali yanglusang Kibuba Nasa teti tatem maka chuba sang.
Kotak aser alima nung maneni ne tenünga sanga sarasademdi.
Sarasadem tashi dak alaka alima nung danga tashi kecha melika.
AMEN.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nigeria nung tepsetba Khristan 27 atema asüpila sentong agi



August 01, 2026 nü Nigeria nung Naridon yimdak tepsetba Khristan 27 atema külem asüpila sentong agidang tangokba noksa nung angur.

August 05, 2026: Anogo ishika tejaklen Nigeria kübok Kaduna state nung tepsetba Khristan 27 atema August 1 nü külem asüpila sentong ka ayongzüka agiogo; iba sentong nungji Arogo balala nungi pastor tem aser züngsemtem aden.

Kasa tatalokba nung tepsetba evangelical Khristan asem asüpila sentongbo tera jelia agia liasü. July 26, 2026 nü Fulani kiralongrartemi Kauru County kübok Naridon yim amakdang Khristan 30 ji tepseta liasü.

Osangbener den jembidang Catholic Diocese of Kafanchan nung otongdar, Rev. Abai Peter-i, "Nisung meyrjang aikati mangyima asüpila sentong agiba sülen tasü mang 27 ji ali nung remtsüogo. Asüpila sentong nungji tanga Khristan denominations balala nungia pastor tem aser züngsemtem aika dena liasü," ta metetdaksü.

Asüpila sentongji Rev. Julius Yakubu Kundi-i ketdangsüa agi.

"Kiralongrartemi ayaterm mapang nung ghonda ana shi

yim amakdang tai maket nisung aika kaset aser aika yirutsüogo. Iba tatalokba mapang nung Khristan kibong aika tesem balala nung jenshiogo," ta Peter-isa metetdaksü.

Khristan yimtsüng amakdang asürtem rongnung tetsür 10 aser tanur 11 densema liasü, ta Khristan melungtet telok Open Doors-i metetdaksü.

Rev. Kundi-i, "Timtem tejashi liaka tamang jenjang manokshitsüla. Tsüngremi ajak ngudar. Tsüngremi Par nüburtim timtemba ngudar aser pei inyakba yari Pai moatsütsü. Tsüngremer obendang nungi temenen mapatem benshiba mejenbutsi aser pei tamang atema taküm tenla agütsüba ji Pai mamatoksü," ta ashi.

Kundi-isa mangyimer kibongtem dang, Khrista nung asürtem tanaben shia arutsü anungji iba teimla nung tashi angutsü ajungshi.

Paisa Kaduna nung alirtem aser rara agi kongshiba tesemtem nung yimjung aser security atema maneni sarasademang, ta ayongzü.

Arogoi Assam nung tzümetsüng agi kongshirtem yaritsü mepishir



CBCNEI aser Assam Baptist Convention na longjemer Jorhat Christian Medical Center ajanga Assam nung tzümetsüng agi tesama aser takoksa ajurur timtemertem temang repranga mozü angati agütsüba " Medical Camp" ayongzüka akaba noksa nung angur . Assam nung tzümetsüng agi timtemertem asoshi Khristan telok balalai temeim mapatem inyakdagi. (Jorhat , August 05,2026).

August 05, 2026: India nung Catholic lenirtemi Arogotem, Arogoi ketdangsüba shisaliok rejutem aser Khristantem dang Assam nung tzümetsüng agi kongshiba nüburtim yaritsü atema melungsoa tenla agüjang, ta ayongzü.

August 03, 2026 nü Catholic Bishops' Conference of India (CBCI) Tir, Cardinal Anthony Poola aser Caritas India Chairman, Archbishop Linus Neli nati India nung aliba Arogotem dang tzümetsüng agi kongshiba nüburtim yaritsü atema melungsoa tenla agüjang, ta mepishi.

Caritas India-i, tenla aruba ajakji Assam Flood Response 2026 atema amshitsü; tenla ajakji teladak süa amshitsü aser teyari kanga nüngdakbapurtim yaritsü, ta metetdaksü.

Caritas India-isa rongsen agi dang masü saka sarasadem

aser lenmang balala ajanga yaritepang, ta metetdaksü.

Arogo nung lenirtemi, tamangertem longjemer tenla agütsüba ajanga tzümetsüng agi kongshiba kibong meyrjang aika taküm tanaben yangershiba nung yaritsü aser parnok nem teimla tasen ka agütsütsü, ta metetdaksü.

July 19 nungi tenzüka Nagaland aser Assam na nung tzünglu maneni aruba sülen talisa Assam nung tzümetsüng lendong kanga bulur.

August 3 tashi nung Assam nung nisung tzümetsüng lendong nung 87 süogo, ta Assam State Disaster Management Authority-i metetdaksü.

Tzümetsüng ajanga kibong meyrjang aika tesem balala nung jenoka lir; kiojen aika raksatsüogo, alu nung aonsotsü aser kiset shiruru jenti samaogo.

Tesem aika nung tzümetsüng ajema kümdar, ajisüaka tang tashi nisung meyrjang aikati teyari nüngdaka lir.

Tzümetsüng ajanga Assam kübok state trok nung nisung 128,000 dak tali kongshiogo.

State sorkari district pongu nung relief camps aser relief distribution centres 55 amenoker nisung 11,000 dak tali jenokdakja lir.

Diocese of Dibrugarh-ia tamangertem dang tzümetsüng agi kongshiba kibongtem nem injung, aou, süngtsük, cement, kishi/kichiba aser kisüdang amshiba hadir balala tenla agüjang, ta ayongzüko.

Parnokisa tzüngmetsüng agi kongshiba kibongtem nem chipo-aonpu, aben-süoshi, merla-sü, solar milen, tzi filters aser hygiene kits densema teyari balala agüjang, ta ayongzüko.

ANOGO ABEN TSÜNGREM DEN

Temeimji tenükmerem mesüra asüküm masü

Temeimi aremzüker, aser taochi sayur. Temeimi tenük memereimer, temeimi ngasangatem masür.

- Korint 13: 4.

Nisung ajak kasa yanglu, saka ajaki sempet, tashi, rongsen, aser tia balala lir ta metettsüla. Nisungi pei sempet amshibayim nungi tepilaji adokdaksür.

Iba tepila nungji tenükmerem aser asüküm metsüji adokdaksür, kechiaser meimchiri temedemdangba nungi mepilateter. Shirnok tali aka parnok indang bilemdang tenükmerem aitdaksür; makartem atema bilemdang takartem asüküm aser ngasangatema akümer. Temeim tanelai dang item tebilemba ajak koktet, tenükmeren aser asüküm. Tsüngrem nungi anguba temeimi tejak merepranger ta Lai o nungi angatetter. Tsüngrem tsüngdang ajak temenen aser nüngdak akaba purtem lir aser Pa temeimi dang parnok nüngdak peridaksütsü akok.

Kalvary kangki-i dang item temerang asüküm aser tenükmeremji asen temulungjang nungi endoktsü akok. Asenok takümüji Tsüngrem nungi maangka sempet anguba ka lir. Koba mulungjangi aji angatetter iba mulungjang nung tenükmerem aser asüküm malir, kechiaser iba yagi meimchir ajak Khrista temeim nüngdakba purtem lir ta angatetdaksür.

Greece nung Scotland tsür missionary ka tasü mang angu



Elizabeth-Jane Ross

August 05, 2026: Greece nung Scotland tsür missionary ka samaba sülen anogo aika lir la tasü mang ngutetogo.

Missionary Elizabeth-Jane Ross ya Edinburgh nung aliba City on a Hill Church nung züngsem ka liasü. Athens nung refugee tem yariba telok ka nung la-a züngsema liasü.

La July 10 nü sama aser July 18 nü la tasü mang nguteta liasü.

Facebook nung video post ka ajanga pastor Peter Anderson-i, lai tesem aika semdanga nübür aika tenzüka aruogo; la asüba ya takoksa tulu, ta metetdaksü.

Edinburgh nungi arrshi küm 38, Elizabeth-i mapang shia Greece-i oa Khristan melungtet telok ka den yaritepa inyaker. Iba telok jagi takoksa angur tetsürtem aser refugees yarir.

La June 26 nü Greece-i aoba sülen Athens anasa

Keratsini nung telidak liasü. La July 10 nü sama aser July 18 nü Kypseli district nung nisung maliba ki tejen ka nung la tasü mangji angu.

Iba tatalokba dak sendakba nung Greek police-i arrshi küm 26 Afghanistan nunger tebur ka, Sharif Ahmadzai puogo.

Police-i asüngdangyaba mapang nung tebursang jagi, pai la tasü mangji suitcase ka nung bener aoba sülen indok, ta nangzüko.

Sharif Ahmadzai ya boxer ka liasü aser 2017 küm pai Khristan yimsü agizüka liasü. Pa kinüngtsü America tsür, Alaina Hall-i kuli kar metetdakja liasü.

Police-i, "Lai agütsüba kuli aser CCTV kuli mekaibo onoki iba nisungba ya meputetla," ta metetdaksü.

Police-i maneni iba ken o bushisüngdangdar, aser tang tashi nungbo la tepsetba kuliji mejangjar.

AO OSHI ANGAZÜKDAK:**TANÜ ANGAZÜKTSÜBA OJANG****Zülumen**

(n) Zülujang agi ojang adokdakja züluba (spelling)

* Ao oshi nung zülumen medemtsü mapang agitsü.

Zülüok

(adv) tenüing zülua ayu, kakat nung zülua ayu

(recorded, registered in writing)

* Onok senden nung adenertem tenüing ajak kakat nung zülüok.

**OLONG PAITEP # 7589**

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti

- (5)

4. Tsük rudenba

- (5)

6. Temzüng tesashi

- (5)

8. S ___ i

- (3)

9. Nisung rongnung telemsa

- (3)

10. Anogoshi

- (4)

12. Ajanga aor

- (4)

13. Tsük rizüngdak

- (3)

14. Tebang nungi adokba

- (3)

16. Süngdong tatembangtiba

- (5)

17. Meputep

- (5)

LANGTSÜNGLEN

1. Tenük telong

- (9)

2. Committee dang ajar

- (5)

3. Yagi ki okdoker

- (7)

5. Yim lenmang

- (5)

7. Temoatsü keter meyipa aruba

- (9)

11. Kanga junga menemba

- (7)

12. Kenyongi majinü

- (5)

13. Rong kanga tulu

- (5)

OLONG PAITEP # 7588 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,

5. Lenti, 7. Tajangzük,

11. Teronem, 12. Sempa,

13. Jahaz.

NAI-A YA METETTER


Nissan-i e-POWER ta ser unique hybrid technology ka yangluba ajanga alizüing tasen ka tongtetogo. Nissan Qashqai nung next generation e-POWER enoka lir aser iba gari ajanga Guinness World Records™ title ka ngutetogo. Nissan Qashqai ajanga single tank nung 1,980 km tashi oteta liasü aser "longest journey completed by a non-plug-in extended-range electric vehicle SUV without external charging or refuelling" yangluogo.

'Helpmonk' app ajanga Assam tzümetsüing nung timtemer yarir**Guwahati, August 5, 2026**

(Agencies): Assam nung tzümetsüing agi timtemba mapang ka 'Helpmonk' ta ser launched mobile application tasen ka ajanga tzümetsüing agi kongshia alirtemi volunteers, rescue teams aser relief agencies den sendaktepa teyari angur.

Helpmonk ya free disaster response platform ka ama yanglu aser iba app ajanga timtemba nisungtemi live location lemsateper, noksatem upload süteter aser parnok nungdakbatemshiteter. Iba ajanga relief agencies aser volunteers-i mapa tajungba inyakteter.

Helpmonk app ya Assam



nung amenoka aliba boutique travel venture Firingoti-i Deobarnü sayaogo. Iba app ajanga disaster victims, volunteers, NGOs, government agencies, rescue teams aser donors ajak digital platform ka

nung anidener.

"Iba application ya Assam nung tzümetsüing atema relief maparen nung yariteptsü atema sayaogo saka nationwide disaster response platform ka ama yanglu lir aser tarutsü nungbo alima jenjang nung amshitettsü" ta Firingoti co-founder Anuj Kumar Boruah-i ashi.

Iba application ya Dikshit Rajkhowa-i yanglu. Pa ya Assam nung technology professional ka lir saka New Delhi nung alir.

Iba application indang mezüingbuba version ya Assam nung humanitarian tensa atema hopta ka majungdang renema liasü ta Rajkhowa-i ashi.

NFR-i Lumding-Badarpur Hill Section nung Train Services melenshir**Dimapur, August 5, 2026**

(TYO): Northeast Frontier Railway (NFR)-i New Harangajao station anasa railway tracks (Line-1 and Line-2) nung mapa inyaktar aser iba jagi Lumding-Badarpur Hill Section tsungda Line-3 ajanga dang senzür.

Iba mapa inyaktar ajanga NFR-i tsüinglanglen agüja aliba ama train services nung temelenshi aliba metetdaksüogo.

Train athir:

* Train No. 15615 (Guwahati - Silchar) Express - 06.08.2026 nungi apusotsü aliba train athir.

* Train No. 15616 (Silchar - Guwahati) Express - 07.08.2026

nungi apusotsü aliba train athir.

Train mapang melenshir:

* Train No. 15650 (Narangi - Agartala) Express - 06.08.2026 nü 22:30 hrs nungi apusotsü.

* Train No. 15649 (Agartala - Narangi) Express - 06.08.2026 nü 23:30 hrs nungi apusotsü.

* Train No. 15609 (Guwahati - Sairang) Express - 06.08.2026 nü 23:30 hrs nungi apusotsü.

* Train No. 15610 (Sairang - Guwahati) Express - 06.08.2026 nü 21:30 hrs nungi apusotsü.

* Train No. 15611 (Rangiya - Silchar) Express - 06.08.2026 nü 23:30 hrs nungi apusotsü.

* Train No. 15612 (Silchar -

Rangiya) Express 06.08.2026 nungi apusotsü aliba train 07.08.2026 nü 05:00 hrs nungi apusotsü.

* Train No. 14619 (Agartala-Firozpur Cant) Express - 06.08.2026 nü 23:30 hrs nungi apusotsü.

* Train No. 15608 (Silchar - Thiruvananthapuram Central) Express - 06.08.2026 nungi apusotsü aliba 07.08.2026 nü 04:10 hrs nungi apusotsü.

Train mapang shitak nung apusotsü:

* Train No. 12503 (SMVT Bengaluru - Agartala) Express- 04.08.2026 nungi apusotsü aliba ama asütsü.



INDIANOIL INVITES APPLICATIONS FOR APPOINTMENT OF NDNE LPG RETAILER IN NAGALAND FOR EXCLUSIVE MARKETING OF PACKED COMMERCIAL & INDUSTRIAL LPG (NON-DOMESTIC NON-EXEMPTED) LPG RETAILER

Indian Oil Corporation Limited (IOCL), Marketing Division, Indian Oil AOD State Office -i Nagaland nung item tesemtem nung Commercial aser Industrial customers dang Packed Non-Domestic LPG ayoktsü atema NDNE LPG Retailer shimtsü renema aliba osang sangdonger.

Iba atema temsüa alir nisungtem, Partnership Firms, Companies, Government Agencies, Cooperative Bodies, Federations aser Non-Profit Organizations nungi tang NDNE LPG Retailer Policy nung aliba inyakyim ajanga Application meshir..

BILEMA ALIBA TESEMTEM :

Sl. No.	Name of Location	District	Category	Area of Operation	Indane Divisional Office
1	Kohima (within municipal limits)	Kohima	Open	Kohima district	Tinsukia

ELIGIBILITY & APPLICATION FORM: Iba atema temetetsürtem aser shimtsüba criteria aser application format ajak IOCL's official website: <https://www.iocl.com/pages/lpg-distributorships-overview> nung angutsü, Application forms-ji Tinsukia Indane Divisional Office nungia agitsü akok.

APPLICATION FEE: Application den non-refundable application fee sen Rs. 5,000/- (Rupees Five Thousand only) Demand Draft ka Indian Oil Corporation Limited tenüing nung Tinsukia nung agizüktetsüsa renemer agütsütsüla.

Application form nung aketba ajak jungjunga renemer application fee dena sealed envelope nung tsüinglanglen agüja aliba address nung **09.09.2026** anogo nikongdang **1700** akok tashi nungbo tongtsütsüla.

CONTACT ADDRESSES: Divisional LPG Sales Head, Tinsukia Indane Divisional Office, Indian Oil Corporation Limited, Sripuria Road, Tinsukia, Assam - 786125. Contact No.-(0374) 2334541,2335354

TONGTIBANG TEMETETSÜTEM : (1). Non-Domestic LPG Retailer asütsü atema shimerji Packed Non-Domestic LPG Cylinders asoshi dang asütsü aser Domestic LPG customers tenüing mezülüoktsü. (2). Iba mapa atema shimer nem Letter of Appointment (LOA) magütsü dang, tamasa interest-free refundable Security Deposit sen Rs. 3,00,000/- (Rupees Three Lakhs only) Indian Oil Corporation Limited nem agütsümatüla. (3). Shimbarenji tang amshia aliba IOCL NDNE LPG Retailer Policy aser mapang - mapang shia agiba amendments ajanga inyaktü. (4). Ibai business inyaktü asoshi renemba sentong ka dang lir, anungji mapa agütsütsüba aser tajangzük alitsübatem indang guarantee magütsüteter.(5). IOCL-i kecha kuli magütsüi iba advertisement ya cancel, withdraw, amend asütsü mesüra anogo atsülangtsü asoshi tashi mekaa ayur.

Chief General Manager (LPG)
Indian Oil Corporation Limited
Indian Oil AOD State Office, Guwahati

Rs1crore agütsü

Guwahati, August 5, 2026
(Agencies): Meghalaya Chief Minister Conrad K. Sangma-i Assam Chief Minister's Relief Fund nem Rs 1 crore tenla agütsüogo aser iba ya tzümetsüing nung relief & rescue maparen nung amshitsü atema lir.

Assam Chief Minister Himanta Biswa Sarma-i Conrad K. Sangma aser Meghalaya nung alirtem dang p e l a b a metetdaksüogo.

"T a n ü Meghalaya Chief Minister's Relief Fund nungi Chief Minister's Relief Fund nem Rs 1 crore agütsüogo" ta CM Sarma-i Mongulbarnü ashi.

"Assam nung alirtem tenüing nung ni Chief Minister Conrad Sangma aser Meghalaya nung alirtem dang iba ama mapang tamajung ka nung onok den külemi noktaka atema p e l a b a metetdaksür" ta pai ashi.

US aser Iran jembishinü tajung kaogo: Trump



Washington, Luroi/August 05 (Agencies): US Tir Donald Trump-i par administration ajanga Iran den Mongulbar anogo tepiyong jembishinü tajung kaogo ta ashiba ajanga ita pongu rara tembangtsü asoshi teimla agütsür.

Mokdanga aliba Strait of Hormuz ajanga rong tem akhi ama senzütsü atema tezüngzüktep ka yanglutsü akok ta teimla ngua Bodhbarnü Asia nung totzü jenjang ajema akum aser stocks timba akum. "Parnok anogo tepiyong jembishinü aka. Strait of Hormuz yakta lapoktsü. Parnoki ano meyipa ora, parnok dak kanga sashia amaktsü," ta Trump-i Fox News indang "@ Night" show nung ashi.

Trump-i aiben tezüngzüktep meyanglura tashi agi amaktsü ta Tehran amokmerena aru aser jembishinü nung terenlok lir ta ashi, saka tang tashi

tangatettep kati marur. Oman den tezüngzüktep yanglua strait tanaben lapoktsü asoshi US aser Iran interim agreement ka yanglutsü anameta nung lir, ta region nungi osang ana aser US ketdangsür kati ashi. Strait of Hormuz ya shilem ka Oman kübok lir.

Osang ajanga ashiba agi, Washington-i Bodhbarnü sangdong agütsütsü nükjidong lir.

Ajisüaka Iranian state media ajanga ashiba agi, United States-i Iran amokmerenba manen tashi Oman den strait asoshi tezüngzüktep yanglutsü aliba menutsü. Rara metenzükdang alima nung totzü aser liquefied natural gas shilem 20 shi iba tzu lenmang ajanga bena liasü.

Rara tenzükdang Trump-i nükjidong ayuba tang tashi metongteti lir aser aji Iran indang nuclear programme

raksatsü, region nung tsükchir dak amaktsüba tashi azüoktsü aser Iran nungeri par putir yimsüsüba atsüngdoktsü tensa yanglutsütsü lir.

Iran-i Hormuz ajanga senzüba rong timba soita lir aser Washington-i Iran dak sendakba rong aser rongnendak tesemtem mokdanga lir.

Tehran-i jembishinü masür ta shiaka Qatar-ibo rara tembangtsü merangba nung terenlok lir ta shia liasü.

Mongulbarnü phone ajanga jembidang Trump aser Qatar Emir Sheikh Tamim bin Hamad Al Thani nati Washington aser Tehran tsüngta mangatettep ajemdaktsütsü merangba aser yimjung kati arutsü atema shisa lemsatepa liasü, ta Qatar nung Emir office ajanga ashi.

Iran Foreign Ministry odongtar Esmail Baghaei-i ashiba agi, strait ajanga rong senzütsü atema Oman den jembishinüba junga lir aser metembang, aser rong senzütsü tesemtem amenoktsü asoshi rangloker. Linük anaprong temeden aser national security wazüka ayutsü nükjidong yur iba lenmang atema jembir ta pai ashi.

Iran-i mapang talangka nungi Strait of Hormuz azüoktsü asoshi khanga arur aser iba ya tükum külen aliba Oman den lemsateptsüla ta ashir.

Yemen nung Iran den sendaktepa aliba Houthi nungeria Red Sea nung Saudi Arabia indang rong tem nokdanga totzü abenba lenmang timba shibanga lir.

Onoki kanga meima aliba asür LIMAINLA JAMIR küm ana ajungba menungra bilemteter 29/6/1976 - 6/8/2024

Nai onok toktsür orr tanü küm ana ajunger, na onok dang nungi pilaa aoba tejashi mesamar.

Nai onok takümtem nung tepela agi süngdaksü aser onoki nü dak jenoktsü ta teti mulung anisüngzüka

liasü. Nai nü taküm kanga junga litetogo, onok ajungmesor tulutiba aser teküzmüker tuluba na liasü.

Tasüba agi na onok ket nungi rakzüka bener oaka, onok mulungjang nung na teti lir, nü ola aser nü menürem onok temulung nung tenoktenoka lir.

Onoki na kanga meimer aser kodanga mamadoktsü. Nü temeim jabaso aser kinungertem.



MULUNGNEN O



(28.12.1956 - 07.07.2026)

Onoki teti meima aliba asür Obala Sütsüngnenba Jamir (Changtongya) mapang tatsüka shiranger iba lima toktsür ao tashi nung kija, kibong, arogo, lokti ana aser talang nungi shirnokisa nübu, shisatsü, mapang, rongsen aser sarasadem agüja ozü asükhu lemsatepa ozü mulung süneptsüogo, nenok ajak dang ozü mulung taroktiba nungi kanga pelaba lemsateper. Tsüngremi nenok mapa tajung atema moshia moajangma.

~ Temeim Kinungsü, Chirnurtem, Semchirtem & Sosemdangsem.

Russia-i ballistic agi Ukraine amak; nisung 17 tepsetogo

Kyiv, Luroi/August 5 (Agencies): Russia-i Bodhbarnü Ukraine yimtiba Kyiv aser yimti temeket nung aliba tesemtem dak ballistic missile tem khaloktsüba sülen nisung 17 tepsetogo, aser tongtibang retailer tem indang warehouse aser logistics centre tem raksatsüogo, ta Ukraine nunger ktdangsürtemi metetdaksü.

Mesangwa tsüngda Ukraine yimtiba kübok tesem aika nung bomb apokba ola angashibatem iba ajanga yimti ajunga sangwaja liasü. Russia-i hopta ishika tsüngda Ukraine ya anogo asem pezü tsüngda khenbo anüng ajanga maka arudar.

Tir Volodymyr Zelenskiy-i, Ukraine ket nung missile defence maliba ajanga maneni nüburtem taküm samadar ta ashiba den, Ukraine nem teyari agütsüba linüktem dang interceptor tem agütsütsü mepeshia metetdaksüogo.

Ukraine indang air defence temi Russia-i yokba drone 115 nungi shilem 90 bo khadangogo, saka ballistic missile 24 aser Zircon cruise missile pezü

yokba ka danga mekhadangteti liasü, ta air force-i ashi.

Ukraine ita aika US indang air defence missile; Patriot systems agi anüngba ajanga timtema arudar. Patriot systems kija yagi Russia indang ballistic missile tem khadangteter. Ballistic missile tem ola dang nungi kanga agi terakaraba yimteter. Ukraine defence tashi meiti aliba mapang Russia-i ballistic missile tem amshia Kyiv aser Ukraine kübok yimti balala taliba maka arudar.

Ketdangsürtemi ashiba agi, Bodhbarnü amakba mapang nisung 40 dak tema yiruogo.

Missile tem ya timba warehouse, infrastructure aser railway station ka dak rangloker khalokja liasü, ta Zelenskiy-i ashiba den, brewing company ka, kisüjensüdang amshiba oset bendena ayuba warehouse tem aser tanga civilian logistics facility tem raksatsüogo.

"Ballistic missile interceptor tem ali asübo tanü tepsetba takümtem kümzükteter lila," ta Zelenskiy-i ashi.

"Menomeyanga supply

magütsüba mesüra anti-ballistic system tem agütsütsü memulungba ajanga nisung asüba aser teraksatsüba tulu adoker ta onok indang partner tem angatettsü kanga tongtibang lir," ta paisa shisem.

Kasa mapang nung Russia indang Defence Ministry-i ashiba agi, parnoki Kyiv aser yimti temeket nung logistics centre tenet makogo. Parnoki ashiba agi item tesemtem ya dual-use good aser drone yangludang amshiba osettem rezünga ayutsü mesüra lemshitsü atema amshia liasü.

Russia-i 2022 küm February ita nungi Ukraine amak tenzükba sülen linük anapronglai Civilian tem dak rangloker jenjang magir ta shia arudar.

Maneni Kyiv-ia meyipier telangzüba agütsütsü merangba mapang Russian online retailer Wildberries indang logistics hub ka makogo.

Ukraine nung home improvement aser DIY retail chain tulutiba Epicentr-i ashiba agi, Russia-i amakba mapang logistics facility tongtibang ana aser factory ka minute ishika

tsüngda raksatsüogo. Teraksa balala adokba indang tangsa tangbo shia matatettsü, ta parnokisa shisem.

"Iba ya Ukraine indang manufacturing, logistics, mapa aser linük yanglushitsü tashi asa-a amakba lir," ta Epicentr-i ashi.

Online retailer Rozetka co-founder Iryna Chechotkina-i ashiba agi, lai la taküm tepeyong inyakba ballistic missile asem agi amakba sülen milak nung samatokba repranga ata-a liogo.

"Ni kanga temulung raksa liasü," ta lai Facebook ajanga ashi. "Ajisüaka iba tejashi ya ni abentsüla. ROZETKA maneni inyaksangshidar," ta laisa shisem.

Küm pezü dak tema rara saka Ukraine indang rongsenketzüng meraksai lir aser iba ya anüolen aliba linüktemi teyari balala agütsüba ajanga lir. Ajisüaka shishilemba balala nung takoksa ajangshiba taliba küma odar.

Ato Kilonser Sergii Koretskyi, shiba taoba ita mapa agizüka liasü pai ashiba

agi, sorkari shishilembartemden jongdak senden ka ayongzüka logistic aser shishilembaba company tem kecha tetsüdaksü makai inyaksangshitsü atema koda inyaky nung ajungtsü iba indang sensak asemstsü.

Kyiv-i, Patriot interceptor missile tasenba PAC-3 tali agitsütsü atema mepeshia arudar. Iba missile yagi Ukraine dak khaloktsüba Russia indang ballistic missile tem khadangteter.

Ukraine nem Patriot missile tem yangludaktsütsü atema United States-i sensaksema arudar. Tir Donald Trump-i iba temelaba agütsütsü kangabo timla mali ta shiogo, saka ken o jangja aliba source pezüi sensaksem maneni akaba jangjashitsüogo.

Russia aser Ukraine na rara anena yimjung bener arutsü atema US teyongtsüi ia sensaksema arudar, saka US aser Israel nati Iran amak tenzükba sülen sensaksem bangdaker lir, aser iba mapang linük ana kati ka taliba maktepa arudar.

Mokokchung nung kaketshirtem Basketball tournament kadagi



Mokokchung nung 2buba Inter High School & Higher Secondary School Basketball Tournament tenzükba sentong tongti tejaoker District Education Officer Mokokchung Wt. Arenla-i tournament tenzüksür aser DBS Dimapur aser GHS Changki tsüngda mezüngbuba asaya asayaba mapang tangokba noksa.

Mokokchung, Luroi/August 5 (TYO):

Basketball Association Mokokchung District-i (BAMD) ayongzüka 2buba Inter High School & Higher Secondary School Basketball Tournament, BAMD Basketball Court Mokokchung nung tanü nungi tenzüka kadagi aser August 07 nü tembangtsü. Iba tournament nung High School-2 aser Higher Secondary School-6 ta shilem agidagi. Asayamung nung ya Dimapur district nungi Don Bosco School aser Holy Cross Higher Secondary School atuagi shilem agidagi.

Tanü iba tournament tenzükba sentong nung tongti

tejaoker District Education Officer Mokokchung Wt. Arenla-i jembidang, BAMD-i lanurtem tesem balala aser school balala nungi adenshia iba tournament nung shilem agidaksütsü maongka lapoktsüba ya asameyang tajung lir aser iba ya ajanga lanurtem saisapong nung ajungkettsü teimla tulu angur ta ashi.

Tongti tejaokerisa asayaba mapang nung asayartemi külem asayartem nungi yimya tajung aika angazüksü merangtsüla, kechiaser asayaba nung asayar shiai pai dak aketba sempet amshia asayadang kati ka nungi yimya tajung aika angazüksü lenmang sadema lapoker. Iba

den külemi asayar kati tamakok nguaka tamakokji ajemalua agizüksü, aser tarutsü aser jenjang renemshitsü merangtsüla ta asayartem ayongzüka jembi.

Mokokchung Town Baptist Arogo Asso. Pastor Wb. Monglier ajanga sentong nung Tsüngrem dang nungi lenisüba meshia sarasadem, Tournament Organising Committee Convenor Wt. Tutu Jamir ajanga tarur pela agizükba o jembi aser Jubilee Memorial School nungi Kr. Arenjungla ajanga ken tajung ka aten aser Technical aser Refree Coordinator ketdangsüba nung tenangzükba agia liasü.

Jamshedpur FC ken o: Tata Steel-i asayartem nem teyari agütsütsü

Luroi/August 5, 2026

(Agencies): Tata Steel indang Corporate Services vice president, Sundara Raman-i ashiba agi, Durand Cup tembangba sülen Jamshedpur FC nungi football asayar ka danga tanga club-i meshimra parnok den tenangzüktepba yanglur aliba ataloktsütsü. Jamshedpur pur taküm nungi Indian Super League nung masayatsü atema telemtetba agiogo.

All India Football Federation aser Football Sports Development Ltd na tsüngda Master Rights Agreement tembangba sülen ita aika ISL tarutsü mejangjai aruba sülen Jamshedpur-i ISL nung shilem magitsü telemtetba agiogo.

Jamshedpur pur tang Durand Cup nung asayadar, saka iba asayamung tembangba sülen team loksatsü aser iba ajanga asayartem tarutsü mejangjai kümogo.

"Onoki asayartem nem option anaprongla agütsüogo.

Kari danga tanga club nung denera onoki teyari agütsütsü. Asayar kar danga shingai meshimra tenangzüktepba yanglur aliba ataloktsütsü," ta Raman-i ashi.

Iba osang sangdongba sülen Jamshedpur FC nungi asayartemi social media ajanga club dang parnok telemtetba asadangshitsü mepeshia metetdaksüogo.

"Onok CEO Mukul Choudhari-i asayartem den jembia iba telemtetba agiba metetdaksüogo. Onoki parnok tebilemba mangadang saka indang indanga osang agütsüogo," ta Raman-i ashi.

"Iba ajanga inyakyim ajak nungbo mekongshitsü. Coach, technical staff, functional staff aser onok indang youth programme nung sendaka alir ajak taoba mapang ama inyaksü," ta Raman-isa shisem.

Ketdangsür yagi ashiba agi, Tata Steel-i, grassroots football aser lanur asayartem anitettsü asoshi rangloker inyaksü.

Alcaraz Cincinnati Open nung masayatsü



Luroi/August 5, 2026

(Agencies): Carlos Alcaraz tekanük yirur aliba ajanga Cincinnati Open nung masayatsü atema telemtetba agiogo, ta asayamung ayongertemi ashi. Iba ajanga Spain nunger asayar ya iba ita US Open nunga pa indang title defend mesütettsü akok ta bilemer.

"Asayamungtem nung maneni shilem agitsü atema Carlos-i takok tashi merangdangdar ta onoki meteta lir," ta Cincinnati tournament director Bob Moran-i ashi.

Grand Slam tenetben koker alisang ya April ita Barcelona Open tanabuba round nung yiruba sülen khen danga asaya mali, saka pa August 13 nungi 23 tashi Cincinnati nung asayatsü aliba iba ATP Masters 1000 event nungbo asayatsü renemer liasü, koba pai taoba küm kokogo.

Alcaraz yiruba ajanga pa indang French Open title defend mesütet aser Wimbledon-a masayatet. Ajisüaka arishi küm 23 tain asayar yagi taoba hopta

ishika tsüngda pa training agiba mapang tangokba video tem lemsatepba sülen pa asaya tenzükshitsü ana nung lir ta sayua liasü.

Winston-Salem Open koba Augusr 23 nü nungi tenzüka asayatsü lir, iba asayamung ya Alcaraz asoshi US Open metenzük tsüngda asayar kar nung shilem agitsü asoshi maongka ka asütsü, ajisüaka world No 2 asayar yagi pa iba ATP 250 event nung shilem agitsüba indang kecha osang agüja mali.

Taoba küm Cincinnati Open final nung world number one Jannik Sinner yirur masayatettsüsa akümba sülen Alcaraz-i iba asayamung akok aser iba sülen pai US Open-a tanabenbuba koka liasü.

Alcaraz-i taküm kanga junga asaya tenzüka Australian Open akok aser pa ya teburtem rongnung Grand Slam pezüprongla akokba asayar tanobusang aküm. Pa masayaba mapang Sinner-ia Wimbledon koka Grand Slam pongububa koktetogo.

Michael Smith Pakistan batting coach kümogo



Luroi/August 5, 2026

(Agencies): Pakistan-i taoba mapang South Africa nunger first-class cricket asayar aser coach Michael Smith tebur national team batting coach asütsü shimogo. Pa shimba ya Pakistan Cricket Board (PCB)-i Mongolbarnü metetdaksüogo.

Arishi küm 46 tain coach yagi küm ana atema tenangzüktepba yangluogo aser pa red-ball aser white-ball format naprongla nung Pakistan batting coach asütsü. Smith asoshi mezüngbuba mapaji Pakistan team August 19 nungi England den Test asem asayatsü aliba ya asütsü.

Level 4 qualified coach,

Smith ya 2003 nungi 2013 tashi asayaogo, iba mapang pa first-class asaya 89, List A asaya 72 aser T20 16 nung asayaogo. Pa ya tajangshiba aika bena aliba coach ka lir. Pa Pakistan Super League (PSL) nung Islamabad United, Karachi Kings aser Multan Sultans nung inyakogo.

Maneni pa Australia nung Hobart Hurricanes aser Cricket Tasmania nunga batting coach inyakogo aser South Africa nung KZN Inland aser Eastern Province indang coaching consultant ama inyakogo.

Pakistan team format ajak nung aser talisa pressure nung asayaba mapang batter temi junga masayateti aruba mapang

ka nung Smith shimogo. National team nung joko mapang tatsüka batting coach meshimi aruogo aser national selector Asad Shafiq-i mapashia iba shilem agia liasü. Kasa mapang nung taoba mapang fast bowler Umar Gul maneni bowling coach asütsü.

Pakistan team ICC World Test Championship point table nung tang tekububa nung lir.

Pakistan team ya Test asaya ana atema West Indies nung oa lir aser mezüngbuba Test bo parnoki run 90 agi makok. Mezüngbuba innings nung parnoki asayar 4 out ser run 244 yanglur liasü, saka tatembangbuba wicket tenet ya run 38 dang yanglur out asü. Iba sülen innings pezübuba nung run 211 arishiba mapang run 120 dang yanglur asayar ajak out süatok.

Tanabuba Test tenzükogo aser anogo ana asayaba sülen Pakistan team run 76 agi tesülen lir, saka parnok wicket ti anunga lir.

Pakistan tebur cricket team England nung oa August 19 nungi September 13 tashi asayatsü. Iba asayamung ya 2025-2027 ICC World Test Championship nung shilem ka asütsü.

BILEMDANGANG

"Tamakok ajak nung tangazüksü lir."